

blawe/ auch endlichen ganz schwarze flecken heraus  
getrieben / welche die aller bösesten/ vnd gemeinlich  
tödlich sein/ Die weissen flecke/ als die da aus einem  
bösen *corrupten* vnd faulen Zehen *phlegmate* oder  
*pituita generiret*, werden selten erfahren / das sie / wie  
die vorgemelten *maculae*, herausschlagen/ vnd auff  
der haut gleicher gestalt erscheinen.

### Von den Kenn oder Merckzeichen solcher krankheit.

**W**ann die Fleckfeber einen be-  
stehen oder angreifen wollen / so gehet es  
erstlich gar gelinde vnd nicht sehr hefftig  
zu / wie sonst in recht Pestilenzischen  
Fiebern auch zugeschehen breuchlich. Derwegen  
man das vorstehende vnglück nicht gros achtet / son-  
dern verachtet es viel mehr/wil sehen vnd warten/was  
es hienaus/wo ferne nicht gar zu lezt auff den Kirch-  
hoff/zukommen begeret/ Derhalben man auch nicht  
alsbald umb raht fraget/sondern hoffet/es werde sich  
die angefangene schwachheit / etwa selbst verziehen/  
oder ohne alle Erknen vnd billiche Hülfsmittel/wider  
verliehren / Etliche meinen/sie wollen vnd können es  
mit einer starcken *purgation*, oder gutter Aderlaß ver-  
treiben / vnd gar bald los werden / thun diß ohne vn-  
terscheid vnd *discretion* der zeit in dieser krankheit/

B

magna